

FILED
NOV 25 2024
ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

In re the matter of the Confirmation of the Customary Adoption of: K. M. N and P. E. N., minor children	CIVIL ACTION NO. 2022 – 01973 HCT/FPS/MAJ
BY: CHRISTINA M. LEMARI, Petitioner.	LOMNAK & UWAAK EO AN COURT EO AN MANIT

**UWAAN PANEL EO : Nixon David
Associate Judge, TRC**

**Barry Jekkar
Pro Tem Associate Judge, TRC**

**Claire T. Loeak
Associate Judge, TRC**

**JIKIN RONJAKE EO : Majuro Courthouse
Uluga Village, Majuro Atoll
Marshall Islands**

RAAN IN RONJAKE EO : November 14, 20 and 22, 2024

I. Naan in Keppelok

Case in ejelet kokajriri eo iumin mantin Majol an ajri ro ruo im ear bok jikin ibben lellap eo jibwierro, Christina M. Lemari, rikajitok eo ilo case in (“Christina”). Lellap in ej kajitok an court kabin im kalikar ke ear kokajriri ki K. M. N. (“K.N”), eo 14 iio rettan, im P. E. N. (“P. N.”), im ej 16 an iio.

Emaan eo jemeirro, Mikeo Note, ejjab erra ilo an Christina ba bwe ear kokajriri ki ajri rein iumin manit kinke ejelok an kar jela kake kab ear jab lelok an melim nan aer kokajriri ki erro.

II. Kajitok Ko

Kajitok ko rekar itok nan Court rej:

1. Iumin manit, ej aikuij ke wor melim jen ro jinen im jemen ajri eo nan an komman kokajriri iumin mantin Majol? Elane uak eo ej AET, innem bojrak ijin im jab wonmanlok. Ak elane uak eo ej JAAB, innem, etale im kolmenlokjen kake kajitok kein rej laajrak ijin:
2. Rikajitok eo ear ke kokajriri ki K. N. ak P. N., ak erro jimor iumin manit eo?
3. Etan manit eo ak manit ta eo?

Kin melele kein rej laajrak ijin lal, kemij loe bwe ajri rein jimor, K. N. im P. N., rej kokajriri ro an Christina iumin mantin Majol in kanin lujen.

III. Melele Ko Remool

K. N. im P. N. rej ajri ro nejin Kristen Kaminaga im Mikeo Note. K. N. ej jokwe ibben jinen im jibun ilo Majol, ak P. N. ej jokwe ibben jemen, Mikeo, ilo Salem, Oregon, USA.

Mikeo ear kamool im ba ear jaje kake an Christina kokajriri ki ajri rein, im ear jab lelok melim ke rej drik, im ejjab konan lelok melim eo an rainin, kinke ej mour wot. Ear bareinwot ba bwe ilo an kar komman kokajriri eo an ledrik eo nejin erittolok, L. K. N. (“L. N.”), ilo Civil Action 2009-222, ear jab bar lelok an melim. Ak ear jaje pepa in ta eo ear droor eltan pein ie bwe ear jab kanooj lale im liniri jeje ko loan.

Mikeo ear bareinwot kamool ke ear maron in jermal iumin jet allon ko ilo Long Island Hotel, botap enanin aolepen torein belele eo an ibben Kristen, ear jab maron in jermal ak ear kokajriri im lale ajri ro ilo imon jokwe eo aer. Ear jab maron kake aikuij ko aer ak ear bed im lale ir einwot juon jemeir.

Christina ear kamool im ba bwe ear kojbarok im lale Kristen ilo aolep tore ko ej bed ilo an lab lojen kin ajri ro aolep, im ear bareinwot lale ajri ro ilo tore ko aolep ajri rein jibun rekar lotak; im ilo aer aolep drik im rittolok. Ear juon eo ear bok eddroin aolep aikuij ko aer kinke ear jab wor an Mikeo jermal. Im ejanin bojrak an kake aikuij ko aer nan rainin; ilo an

ajri rein etal im jokwe im bed ibben jemeir jet ien, ej bareinwot bok kunan im kake aikuij ko aer im bok eddroin aer etal itok ilo kotaan Majol im Oregon, im jilkinlok aer aikuij.

Christina ear bareinwot kwalok ilo naan in kamool ko an ke Mikeo ear lelok melim nan aer kabin kokajriri eo ear komman iumin manit nan aolep ajri ro nejierro Kristen, im ilo tore eo, ear maron in wonmanlok pepa ko ikijen kokajriri eo an L. N.. Ijowotke, ilo torein im ejako an belele ibben jinen ajri rein, im einwot an wor bar juon riturin, emoj an ukot an lomnak jen an kar lelok melim eo nan e moktalok.

Jinen ajri rein ear bareinwot rie naan in kamool ko an Christina ilo an ba bwe jen ke ajri rein rar bed loan lojen im lotak, im ilo aer drik im rittolok tore eo ej belele ibben Mikeo, im ilo tore eo erro ear jebel tok nan rainin, Christina ear jab bojrak, im ejanin bojrak, an jiban e kake aikuij ko an im an ajri ro nejin, ekoba K. N im P. N..

Court in ej kile ke ilo aolepen tore eo erro ear mour in belele, jinen im jemen ajri rein ekoba ajri ro nejierro, rekar aolep mour im jokwe ibben Christina ilo imon jokwe eo an ilo bukun in Rairok, aelon in Majuro. Im ilo torein, Mikeo ear jermal iumin jet allon ko, ak enanin aolepen torein belele eo an ibben Kristen, K. N. im P. N., ekoba ledrik eo erittolok jen erro, L. N., rekar aolep bed iumin kojbarok eo an Christina einwot juon eo ej lale ir im kake aikuij ko aer, einwot juon jinen ak jemen bamle.

Im ebin an Court in bok naan ko an Mikeo ilo an ba bwe ear jab lelok melim nan an Christina kokajriri ki L. N. einwot ke ear jab jela pepa in ta eo ear droor eltan pein ie, im ear jab lelok an melim bwe en bar kokajriri ki K. N. im P. N.

Ak, Court in ej loe bwe Christina ear lale ajri rein jibun, K. N. im P. N., einwot lukin nejin, ilo an kar naajidrik ir im kake aikuij ko aer, im ej konan eo an in bwe en lukin alikar im ejelok wawein ko renaj bobrae ki ak kabojrak e jen an lale ir einwot lukin nejin.

Court in ej watok wawein kein rekar bok jikier; jen ke ajri rein rekar bed loan lojen jineer tok im ien eo rej lotak, ekoba aolepen tore in im rej drik im rittolok ilo an jineer kotlok

bwe ren jambo lok ibben jemeir, im einwot an jab bojrak an Christina naajdrik lok ajri rein im kake aikuij ko aer; wawein kein aolep rej kalikar ke ear bok jikin mantin Majol eo *kanin lujen*.

IV. Etale Mantin Majol Eo Ejelet Case In

A. Kanin Lujen

Kanin lujen (jipeel ko jet, kanin lojeo, kani-lujen) ej mantin Majol eo ej kwalok kadkadin juon ajri eo emoj kokajriri ki einwot lukin nejin, ak kanin lojen, ak koban lojeo. Juon ajri eo wawein lale ej einwot im watok lukin nejin ak ej kanne im ekkan nan lojen ilo wawein an kokajriri ki im lale. *Jacob v. Hermios and Kendall, CA 2008-221 (2012)*. Einjuon im oktak jen kokajriri eo ej alikar ilo case ko an *Amon v. Makroro, 5 TTR 436 (1971)*.

Iumin mantin Majol, melim eo jen ro jinen im jemen ajri eo ejjab juon men eo elukin aurok nan boke mokta jen an wor kokajriri in, kanin lujen. Ilo case in kio, ear ejelok melim jen Mikeo bwe Christina en maron naajidrik im lale jinen ajri rein ilo an lab lojen kake ir im ien eo ej kiotak, im ear bareinwot ejelok ilo ien eo ear lale im kake aikuij ko an ajri rein elkin aer lotak im ilo torein im rej rittolok wot. Christina ear wonmanlok wot im jab bojrak jen an lale im kake aikuij ko aer einwot ne lukin nejin.

Christina ear maron in kwalok nan Court in ke ear kokajriri ki K. N. im P. N. iumin mantin Majol ilo an kar lale ir jen ke rekar bed loan lojen jineer. Jinen ajri rein ear maron in rie naan in kamool ko an Christina ilo an kar bok ajri ro nejin im kokajriri ki ir aolep einwot koban lojen im lukin nejin.

Ilo an Christina kokajriri ki ajri rein einwot lukin nejin, ear jab drebij ir jen jemeir ak jineer ekkar nan manit. Kokajriri iumin mantin Majol ejjab drebij ajri ro jen ro jiner im jemer ak ej kolonlok uwaan bamle eo aer nan aer iakwe ir im kojbarok ir ekkar nan manit kein ad ilo ad jiban dron, jela nae dron im iakwe dron.


V. Naan in Kojjemlok

Kin un kein emoj kwelok ilon, Court in ej loe bwe Christina ear kokajriri ki ajri rein,
K. N. im P. N., iumin mantin Majol in, kanin lujen.

Dated: 25 November 2024.



Nixon David
Associate Judge, TRC



Barry Jekkar
Pro Tem Judge, TRC



Claire T. Loeak
Associate Judge, TRC